

OHR pozdravlja izjavu koja je okrenuta ka budućnosti



Ured visokog predstavnika danas je pozdravio obraćanje predsjednika SDA Sulejmana Tihića na novogodišnjoj konferenciji za štampu te stranke, kao nastojanje da se stavi tačka na politiku koja ne vodi nigdje, što je često bila karakteristika politike u Bosni i Hercegovini, te da se umjesto toga naglasak nedvosmisleno stavi na budućnost, prihvatajući pri tome da nadležne ustanove moraju objektivno rješavati slučajeve koji predstavljaju nasljeđe prošlosti. Međunarodna zajednica i EU već dugo apeluju na bh. lidere da pokažu odgovornost prema ovoj zemlji i rade na njenom približavanju EU i NATO-u. U svom obraćanju, gospodin Tihić obećava upravo to. Nadamo se da će ovo istinski državničko obraćanje imati odjeka i kod drugih lidera te da će se preći sa riječi na djela.

Kao što je Upravni odbor Vijeća za provedbu mira već ranije naglasio, odgovornost za napredak zemlje data je u ruke bosanskohercegovačkih vlasti. Uprkos tome, mnogi bh. lideri nisu preuzeli odgovornost za reforme niti pak odgovornost za zemlju u cjelini.

Činjenica da u posljednje dvije i po godine nije postignut napredak u provedbi Daytonskog mirovnog sporazuma kao i obaveza ove zemlje u smislu približavanja EU ne samo da su se loše odrazile na međunarodni ugled Bosne i Hercegovine, nego se pogoršala i evropska perspektiva samih građana.

Dvadesetšestog decembra gospodin Tihić je poslao pozitivan signal EU i međunarodnoj zajednici, pokazujući da barem neki od bh. političara osjećaju odgovornost prema ovoj zemlji, njenim građanima i njihovoj euroatlanskoj budućnosti.

Otrgavši se od negativne spirale koja postoji već dvije i po godine, gospodin Tihić je iskazao političku hrabrost kakva se rijetko viđa u ovoj zemlji. Pokazao je da je moguća promjena pristupa bosanskohercegovačkih političkih lidera. OHR poziva druge političare da se povedu za tim primjerom.

Organi vlasti BiH moraju se vratiti naporima da provedu potrebne reforme; u protivnom postoji opasnost da se BiH udalji od EU. Godina 2009. biće ključna za Bosnu i Hercegovinu. Cijela regija ide prema EU i građani ove zemlje imaju pravo da očekuju konkretne korake ka podizanju životnog standarda i ubrzanju napretka na evropskom putu. Bez promjene pristupa, BiH će zaostati za svojim susjedima.

OHR podsjeća da su i Upravni odbor Vijeća za provedbu mira i ministri vanjskih poslova EU pozdravili zajednički izjavu predsjednika SDA, SNSD i HDZ BiH iz Pruda od 8. novembra kao način jačanja kapaciteta ove zemlje da postigne napredak. OHR očekuje od vlasti BiH da ove prijedloge pretoči u konkretnu formu te apeluje na političke lidere BiH da prihvate podršku koju su zajedničkoj izjavi iz Pruda dali Upravni odbor Vijeća za provedbu mira i ministri vanjskih poslova EU.